

四庫全書

子部

欽定四庫全書

古今事文類聚續集卷二十二

宋 祝穆 撰

樂器部

琴 瑟

羣書要語琴者禁也禁止於邪以正人心也 白虎通 琴者

樂之統也君子所當御也 風俗通 琴長二尺六寸六分廣

六寸上曰池下曰賔前廣後狹象尊卑也上圓下方法

天地也五絃象五行大絃為君小絃為臣文王武王加

二絃以合君臣之恩操琴凡琴曲和樂而作名之曰曲憂

愁而作命之曰操通俗平和之人聽箏笛琵琶則形躁

而志越聞琴瑟之音則體靜而心閒嵇康論琴第一絃為

宮次絃為商次為角次為徵次為少宮次為少商三禮圖

黃帝琴名清角齊威公名號鐘楚莊王曰繞梁司馬相

如名綠綺蔡邕名焦尾趙飛燕名鳳凰梁元帝纂要五曲一

曰鹿鳴二曰伐檀三曰騶虞四曰鵲巢五曰白駒十二

操一曰將歸二曰猗蘭三曰龜山並孔子作四越裳周公作五拘幽文王作六岐山周人為文王作七履霜尹伯奇作八雉朝飛牧犢子作九別鶴商陵牧子作十殘形曾子作十一水仙十二懷陵並伯牙作九引一曰列女引二曰伯妃引三正女引四思歸引五霹靂引六走馬引七瑩篴引八琴引九楚引 河間雅歌二十一章蔡氏五弄雙鳳離鸞歸風送遠幽蘭白雪長清短清長側短側清調大道小遊明君朔笳廣陵散白魚歎楚

妃歎風入松烏夜啼

並琴操

瑟瑟者閉也所以懲忿窒慾

正人之德也

白虎通

清廟之瑟朱弦而疏越

疏者畫疏之使聲遲越者

瑟底孔也

一倡而三歎有遺音矣

樂記

雅瑟長八尺一寸二十

三弦常用者十九弦

三禮圖

雲和之琴瑟冬至於地上

之圜丘奏之空桑之琴瑟夏至於澤中之方丘奏之

龍門之琴瑟於宗廟中奏之

禮大司樂

詩句上弦驚別鶴下弦離孤鸞

陶詩孤鸞別鶴皆曲名

閒夜撫鳴

琴

陸士衡

琴清月當戶

陶

我有鳴鳳枝背作蛇蚺皮

坡莊子注

謂蛇腹下齟齬
可以行者也

齊瑟和且柔

選

曲終人不見江上數峰

青

錢起

我醉子鳴琴

歐

古今事實

伏羲作琴

伏羲作琴修身理性反其天真也

琴操

神農削桐

神農氏始削桐為琴繩絲為絃以通神明之德

桓譚新論

神

農氏琴長三尺六寸六分上有五絃曰宮商角徵羽文

武增二絃曰少宮少商

廣雅

舜歌南風

舜彈五絃之琴造南風之詩曰南風之薰兮可以解吾民之愠兮南風之時兮可以阜吾民之財兮故德如泉流至于今王公大人述而不忘

家語

孔子學琴

孔子學鼓琴於師襄子子曰丘得其意未得其人有間曰丘殆得其為人矣黯而黑頎然長曠如望洋奄有四

方非丈王其孰為此師襄子避席而對曰君聖人也其

傳曰丈王操

辨樂

杏壇鼓琴

孔子遊於緇帷之林休坐杏壇之上弟子讀書孔子絃歌鼓琴奏曲未半有漁父下船而來孔子推琴而起曰

其聖歟

漁父篇

鼓琴感猫

孔子晝息於室鼓琴焉閔子聞之告曾子曰夫子何感

若是乎入問孔子曰汝言是也向者吾見貓方取鼠欲其得之故為之音也

子孔叢

鼓琴自娛

顏淵曰鼓琴足以自娛學夫子之道足以自樂回不願仕

莊

伯牙鼓琴

伯牙鼓琴鍾子期善聽之方鼓琴志在太山鍾子期曰善哉乎鼓琴巍巍乎如太山志在流水鍾子期曰善哉

乎鼓琴洋洋乎若流水鍾子期死伯牙擗琴絕絃終身

不復鼓琴以為世無足鼓琴者也

呂氏春秋

琴操南音

晉侯觀于軍府見鍾儀問其族曰伶人也與之琴操南音公曰君子也言稱先王不背本也樂操土風不忘舊

也

左傳

雍門周鼓琴

雍門周以琴見孟嘗君孟嘗君曰先生鼓琴亦能令文

悲乎周曰臣獨焉能令足下悲哉所能令悲者先貴而後賤先富而後貧不若身才高妙適遭暴亂不若處世隱絕不及四鄰詘折擯厭無所告愬臣一為之徵操援琴則涕零矣今若足下千乘之君廣廈邃房下羅帷來清風鬪象旗儼鄭妾麗色淫目流聲娛耳水遊則連方舟戴羽旗野遊則馳弋獵乎平原廣圃入則撞鍾擊鼓乎深宮之中雖有善鼓琴者固未能使足下悲也然臣所為足下悲者一也千秋萬世之後宗廟必不血食高

臺旣已壞曲池旣已漸塋墓旣已下嬰兒豎子樵採者
躑躅其中而歌其上曰夫以孟嘗君尊貴乃若是乎
於是孟嘗泣焉承臉周引琴而鼓之徐動宮徵拂羽角
嘗涕泣增哀下而就之曰先生之鼓琴令丈若破國亡
邑之人

說苑

相如鼓琴

司馬相如素與臨邛令王吉相善臨邛富人卓王孫有
女丈君新寡好音故相如繆與令相重而以琴心挑之

丈君竊從戶窺心悅旣罷相如乃使人重賜丈君侍者
通殷勤丈君夜奔相如

焦尾琴見桐門

琴有殺心

蔡邕在陳留鄰人有以酒食召邕者客彈琴於屏邕至
門潛聽之曰嘻以樂召我而有殺心何邪遂反將命者
以告主人遽自追問其故邕具以告彈琴者曰我向鼓
琴見螳螂方向鳴蟬將去而未飛螳螂為之一前一卻

吾心聳然唯恐螳螂之失也豈此為殺心形於聲乎邕
莞然而笑曰此足以當之矣

女知絕絃

蔡琰邕之女年六歲邕夜彈琴絃絕琰問之曰第一絃
也復斷問之曰第四絃邕曰偶中耳琰曰昔季札觀風
知四國興衰師曠吹律知南風不競由是言之何得不
知口本傳

蓄無絃琴

陶潛不解音聲蓄無絃琴一張每有酒輒撫弄寄意貴
賤造之者有酒輒設潛若先醉便語我醉欲眠卿可去
真率如此

耻為伶人

晉戴逵善鼓琴武陵王晞使人召之逵對使者破琴曰
戴安道不為王門伶人晞怒更引其兄述述聞命欣然
擁琴而往

人琴俱亡

見兄弟門

鼓琴無忤

晉阮瞻字千里咸之子也善彈琴人聞其能多往求聽不問貴賤長幼皆為彈之內兄潘岳每令鼓琴終日達夜無忤色識者歎其恬淡不可榮辱也

琴調不傳

嵇康臨刑東市顧視日影索琴彈之曰袁孝已嘗從吾學廣陵散吾固靳之廣陵散於今絕矣

功臣不操琴

齊王問讌會命侍中嵇紹操琴紹對曰功臣復社稷當執物作則垂之於後紹雖虛鄙忝備常伯腰紱冠冕鳴玉殿省豈可操執絲竹為伶人之事

不好聽琴

唐明皇好羯鼓不好聽琴寧王子汝陽王璿小名花奴時方有奏琴弄未畢上叱去曰速召花奴取我羯鼓來

為我解穢

朱語錄

伏羲作瑟

以下係瑟

伏羲作二十五弦之瑟以制婚姻之禮

通歷

趙王鼓瑟

趙惠文王與秦王會澠池秦王曰竊聞趙王好音請奏瑟趙王為鼓瑟相如前曰聞秦王善為秦音請奏盆缶秦王不懌為一擊缶

取瑟而歌

孺悲欲見孔子孔子辭以疾將命者出戶取瑟而歌使之聞之

曾點瑟希

子曰點爾何如鼓瑟希鏗爾舍瑟而作

子路鼓瑟

子路鼓瑟有北鄙殺伐之聲故孔子曰由之瑟奚為於

丘之門

家語

瓠巴鼓瑟

伯牙鼓琴而游魚出聽瓠巴鼓瑟而六馬仰秣

荀勗學

齊不好瑟

齊王不好瑟有求仕於齊操瑟立王之門三年不得入
客罵之曰王好竽而子鼓瑟瑟雖工如王不好何

古今文集

雜著

琴賦

嵇叔夜

椅桐之所生託峻岳之崇岡含天地之醇和吸日月之
休光鬱紛紜以獨茂飛英蕤於旻蒼其山川形勢則盤
紆隱磷確磈峒崑丹巖嶮巖青壁萬尋若乃春蘭被其

東沙棠植其西涓子宅其陽玉醴涌其前玄雲蔭其上
翔鸞集其巔乃斲孫枝準量所任至人攄思制為雅琴
錯以犀象藉以翠綠弦以園客之絲徽以鍾山之玉爰
有龍鳳之象古人之形伯牙揮手鍾期聽聲華容灼爍
發采揚朋伶倫比律田連操張進御君子新聲繚亮及
其初調則角羽俱起宮徵相證參發並趣上下累應若
乃高軒飛觀廣廈閒房冬夜肅清朝月垂光新衣翠粲
纓徽流芳於是器洽弦調心閒手敏觸攄如志唯意所

擬初涉綠水中奏清徵拊絃安歌新聲代起雅曲向闌
衆手將歇改韻易調竒弄乃發或徘徊顧慕擁鬱抑按
盤桓毓養從容秘玩牢落淩厲布護半散英聲發越采
采粲粲穆溫柔以怡懌婉順叙而委蛇或乘險投會邀
隙趨危嚶若離鵠鳴清池翼若遊鴻翔增崖或樓櫓櫟
埒漂繚澈冽遠而聽之若鸞鳳和鳴戲雲中迫而察之
若衆葩敷榮曜春風若次其曲引所宜則廣陵止息東
武太山飛龍鹿鳴鵠雞遊弦更唱迭奏聲若自然下逮

謠俗蔡氏五曲王昭楚妃千里別鶴淪其體勢洋其風
聲器和故響逸張急故聲清間遼故音埤弦長故徽
鳴性潔靜以端理含至德之和平誠可以感盪心志而
發泄幽情矣

上巳日燕太學聽彈琴詩序

韓愈

與衆樂樂之謂樂樂而不失其正又樂之尤者也四方
無鬪爭金革之聲京師之人旣庶且富天子念致理之
艱難樂居安之暇肇置三令節詔公卿羣有司至于其

日率厥官屬飲酒以樂所以同其休宣其和感其心成
其丈者也三月初吉實惟其時司業武公少儀於是總
太學儒官三十有六人列燕于祭酒之堂樽俎既陳肴
羞惟時醴斚叙行獻酬有容歌風雅之古辭斥夷狄之
新聲褒衣魏冠愉愉如也有一儒生魁然其形抱琴而
來歷階而升坐于樽俎之南鼓有虞氏之南風賡之以
丈王宣父之操優游夷愉廣厚高明追三代之遺音
想舞雩之詠歎及暮而退皆充然若有所得也武公於

是作歌詩以美之命屬官咸作之命四門博士韓愈序之

送楊真序

論琴

歐陽永叔

予嘗有幽憂之疾退而閒居不能治也既而學琴於友人孫道滋受宮聲數引久而樂之不知疾之在其體也夫琴之為技小矣及其至也大者為宮細者為羽操絃驟作忽然變之急者淒然以促緩者紆然以和如崩岸裂石高山出泉而風雨夜至也如怨夫寡婦之嘆息雌

雄雍雍之相鳴也其憂深思遠則舜與夫孔子之遺
音悲歎感憤則伯牙孤子屈原忠臣之所歎也喜怒哀
樂動人必深而純古淡泊與夫堯舜三代之言語孔子
之文章易之憂思詩之怨刺無以異其能聽之以耳應
之以手取其和者道其堙鬱寫其憂思則感人之際亦
有至者焉予友楊君好學有文累以進士舉不得志及
從蔭調為尉於劔浦區區在東南數千里外是其心固
有不平者且少又多疾而南方少醫藥風俗飲食異宜以

多疾之體有不平之心居異宜之俗其能鬱以久乎然
欲平其心以養其疾於琴亦將有得焉故予作琴說以
贈行且邀道滋酌酒進琴以為別

送琴士蕭長夫序

真景元

始予少時讀六一居士序琴之篇謂其憂深思遠有舜
與文王孔子之遺音而淳古淡泊與堯舜三代之言語
孔子之文章易之憂思詩之怨刺無以異為之喟然撫
卷太息曰琴之為技一至此乎其後官於都城以琴來

謁者甚衆靜而聽之大抵厭古調之希微誇新聲之奇
變使人喜欲起舞悲欲涕零求其所謂淳古淡泊者益
不可得蓋時俗之變聲音從之雖琴亦鄭衛矣屈子有
云覽椒蘭其若茲兮又况揭車與江離夫琴猶如此則
凡世俗之樂日淪於淫哇而不可禁者固其所也三山
蕭長夫學琴四十餘年饑寒流落困悴無憊獨不肯遷
就其聲以悅俚耳嘉定丙子秋過予大江之東與之登
鍾山訪定林酌寒泉而撫修竹長夫忻然為鼓一再行

雍雍乎其薰風之和惜惜乎其采蘭之幽跌蕩而不流
悽惻而不怨信六一居士之言有不可欺者蓋其嘗遊
紫陽先生之門習聞君子之義其能窮而不變也固宜
雖然遊先生之門者衆矣顧未聞有不變其學如君之
不變其技者乎此予之所以重歎也於其行飲之酒而
為之歌曰古音之寥寥聽者欲睡兮新聲之洋洋喜而
不知止兮自戰國已然況今之世兮嗟嗟蕭君娛衆所
棄兮我琴可破志不可徙兮彼斲為圓真子所恥兮霜

風脩脩裂子之袂兮子母好游從子歸兮予將俟子於
仙游從子於武夷兮

霹靂琴讚引

柳宗元

霹靂琴零陵湘水西震餘枯桐之為也始枯桐生石上
說者言有蛟龍伏其窾一夕暴震為火之焚至旦乃已
其餘磳然倒臥道上震旁之民稍柴薪之超道人聞取
以為三琴琴莫良於桐桐之良莫良於生石上石上之
枯又加良焉火之餘又加良焉震之於火為異是琴也

既良且異合而為美天下將不可載焉微道人天下之
美幾喪余作贊辭識其越之左與右以著其事又益以
序以為他傳辭曰 惟湘之涯惟石之危龍伏之靈震
焚之奇既良而異爰合其美超實為之贊者柳子

燒琴煮鶴

衛懿公好鶴以亡其國房次律好琴得罪至死乃知燒

煮之士亦自有理

林志

古詩

聽穎師彈琴

韓愈

昵昵兒女語恩怨相爾汝劃然變軒昂勇士赴敵場浮
雲柳絮無根蒂天地闊遠隨飛揚喧啾百鳥羣忽見孤
鳳凰躋攀分寸不可上失勢一落千丈強嗟予有兩耳
未省聽絲篴自聞穎師彈起坐在一床推手遽止之溫
衣淚滂滂穎乎爾誠能無以冰炭置我腸

彈琴效賈島體

歐陽永叔

古人不可見古人琴可彈彈為古曲聲如聞古人言琴

聲雖可聽琴意誰能論橫琴置床頭當午曝背眠夢見
一丈夫嚴嚴古衣冠登床取我琴調作南風絃一奏南
風來再鼓變雲烟鳥獸盡嚶鳴草木亦滋蕃乃知太古
時未遠可追還方彼夢中樂心知口難傳旣覺失其人
起坐涕洟瀾

聽賢師琴

蘇子瞻

大絃春溫和且平小絃廉折亮以清平生未識宮與角
但聞牛鳴盎中雉登木門前剝啄誰叩門山僧未聞君

勿嗔歸家且覓千斛水淨洗從前箏笛耳

東坡云歐陽公嘗問僕琴詩何者最佳余以韓愈
聽穎師琴答之公言此詩固奇麗然自是聽琵琶
詩非琴詩余退而作杭僧惟賢詩詩成欲寄公而
公薨至今以為恨

聽真上人琴歌

范希文

銀潢耿耿霜稜稜西牕月色寒如水江上一叩朱絲繩
萬籟不起秋光凝伏羲歸天忽千古我聞遺音淚如雨

嗟嗟不及鄭衛兒北里南鄰竟歌舞竟歌舞何時休師
襄堂上心悠悠擊浮金戛鳴玉老龍秋啼滄海底幼猿
暮嘯寒山曲隴頭瑟瑟咽幽泉洞庭蕭蕭落寒木此聲
感物何太靈十二銜珠下仙鵠為予再奏南風詩神人
和暢舜無為為予試彈廣陵散鬼物悲哀晉方亂乃
知聖人情慮深將治四海先治琴興亡哀樂不我道坐
中可見天下心感公遺我正始音

詩話

評古今琴詩

三吳僧義海以琴名世六一居士嘗問東坡琴詩孰優
東坡答以退之聽穎師琴公曰此祇是聽琵琶耳或以
問海海曰歐陽公一代英偉然斯語誤矣昵昵兒女語
恩怨相爾汝言輕柔細屑真情出見也劃然變軒昂勇
士赴敵場精神餘溢竦觀聽也浮雲柳絮無根蒂天地
闊遠隨飛揚縱橫變態浩乎不失自然也喧啾百鳥群
忽見孤鳳凰又見脫穎孤絕不同流俗下俚聲也躋攀

分寸不可上失勢一落千丈強起復抑揚不主故常也
皆指下絲聲妙處惟琴為然琵琶格上聲烏能爾耶退
之深得其趣未易譏評也東坡後有聽惟賢琴詩云大
絃春溫和小平小絃廉折亮以清平生未識宮與角但
聞牛鳴盎中雉登木門前剝啄誰叩門山僧未閒君勿
嗔歸家且覓千斛水洗盡從前箏笛耳詩成欲寄歐公
而公亡每以為恨客復以問海海曰東坡詞氣倒山傾
海然未知琴春溫和小平廉折亮以清絲聲皆然何獨

琴也又特言大小絃聲不及指下之韵牛鳴盎中雉登木槩言宮角耳八音宮角豈獨絲也聞者以海為知言余嘗考今昔琴譜謂宮者非宮角者非角又五調迭犯宮聲為多與五音之正者異此又坡所未知也茗溪漁隱曰東坡嘗因章質夫家喜琵琶者乞歌詞亦取退之聽穎師琴詩稍加槩括使就聲律為水調歌頭以遺之其自序云歐公謂退之此詩最奇麗然非聽琴乃聽琵琶耳余深然之觀此則二公皆以此詩為聽琵琶矣

今西清詩話所載義海下證此詩復曲折能道其趣
為是真聽琴詩世有深於琴者必能辨之矣

西清詩話

評古今琴詩

古今聽琴阮琵琶箏瑟諸詩皆欲寫其聲音節奏類
以景物故實狀之大率一律初無中的句互可移用是
豈真知音者但其造語藻麗為可喜耳昵昵兒女語思
怨相爾汝劃然變軒昂勇士赴敵場浮雲柳絮無根蒂
天地闊遠隨飛揚啾啾百鳥羣忽見孤鳳凰躋攀分寸

不可上失勢一落千丈強此退之聽琴詩也孤禽曉枕
聽野露空澗夜落春崖泉又經緯文章合調和雌雉鳴
颯颯驟風雨隆隆隱雷霆無射變凜冽黃鍾催發生
詠歌文王雅怨刺離騷經二典意淡薄三盤語丁寧此
永叔聽琴詩也大絃春溫和且平小絃廉折亮以清平
生未識官與角但聞牛鳴盎中雉登木門前剝啄誰叩
門山僧未閒君勿嗔此子瞻聽琴詩也春天百鳥語撩
亂風蕩楊花無畔岸微陰愁猿抱山木玄冬孤鴈度雲

漢斧斤丁丁空谷樵幽泉落澗夜蕭蕭十二峰前巫峽
雨七八月後錢塘潮孝子流離在中野羈臣歸來哭泣
社空牀思婦感蟪蛄莫年遺老依桑柘此魯直聽琴詩
也寒蟲催織月籠秋獨鴈叫群天拍水楚國羈臣放十
年漢宮佳人嫁千里深閨洞房語恩怨紫燕黃鸝韻桃
李楚狂行歌驚市人漁父拊舟在葭葦此魯直聽摘阮
詩也大絃嘈嘈如急雨小絃切切如私語嘈嘈切切錯
雜彈大珠小珠落玉盤間關鶯語花底滑幽咽泉流水

下灘又銀瓶乍破水漿迸鐵騎突出刀鎗鳴此樂天聽
琵琶詩也一彈旣罷又一彈珠幢夜靜風珊珊低回慢
弄關山思坐對燕然秋月寒月寒一聲深殿磬驟彈曲
破音繁併百萬金鈴旋玉盤醉落滿船皆暫醒又猿鳴
雪岫來三峽鶴唳晴空聞九霄此微之聽琵琶詩也湘
水冷波慙鼓瑟秦樓明月罷吹簫寒敲白玉聲何婉暖
逼黃鶯語自嬌此王仁裕聽琵琶詩也春風和暖百鳥
語礲礲山路行人行啄木飛從何處來花間葉底時丁

丁林空山靜啄愈響行人舉頭飛鳥驚此永叔聽琵琶
詩也八鸞鏘鏘下銀漢九鵠威鳳鳴朝陽馮夷躡躡舞
綠波鮫人出聽織綃梭此夢得聽箏詩也綿蠻巧囀花
間舌鳴咽交流水下泉此永叔聽箏詩也江妃出聽霧
雨愁白浪翻空動浮雲喚取吾家雙鳳槽遣作三峽狐
猿號與君合奏芳春調啄木飛來霜樹杪此子瞻聽箏
詩也永叔子瞻謂退之聽琴乃是聽琵琶詩僧義海謂
子瞻聽琴詩絲聲八音宮羽皆然何獨琴也互相譏評

終無確論如玉溪生錦瑟詩云莊生曉夢迷蝴蝶望帝
春心託杜鵑滄海月明珠有淚藍田日暖玉生烟此亦
是以景物故實狀之若移作聽琴阮等詩誰謂不可乎

評義山瑟詩 以下係瑟

義山錦瑟詩錦瑟無端五十絃一絃一柱思華年莊生
曉夢迷蝴蝶望帝春心託杜鵑滄海月明珠有淚藍田
日暖玉生烟此情可待成追憶只是當時已惘然山谷
道人讀此詩殊不曉其意後以問東坡東坡云此出古

今樂志云錦瑟之為器也其絃五十其柱如之其聲也適怨清和案李詩莊生曉夢迷蝴蝶適也望帝春心託杜鵑怨也滄海月明珠有淚清也藍田日暖玉生烟和也一篇之中曲盡其意史稱其瑰邁奇古信然

湘素雜記

湘靈鼓瑟

杜甫酬高蜀州云鼓瑟至今悲帝子注湘妃堯之女故曰帝子傳言湘靈鼓瑟

琵琶阮

羣書要語琵琶本蕃部馬上所鼓也推手前曰琵引手

却曰琶因以為名

釋名

琵琶長三尺五寸法天地人與五

行又四絃象四時

風俗通

中虛外實天地象也盤圓柄直

陰陽叙也

傳玄賦

琵琶曲有轉圜六么獲索梁州皆其名

也

樂譜

柄如翠鳳之仰首盤似靈龜之背甬盤圓含靈太

極形也三材片合兩儀生也分柱列位歲數成也回窻

華表日月星也

晉成公綏賦

尋斯樂之惟始乃絃鼓之遺事

慰遠嫁之羈情寬絕域之歸志又云析梓文以縱分割

香檀而橫列

虞世南賦

素手紛其若飄兮逸響薄於高梁

傅玄

賦

詩句促節縈紅袖清音滿翠帷

唐太宗

千歲琵琶作胡語

分明怨恨曲中論

杜

琵琶絃促千般調

方

金槽琵琶夜

張張

李賀

古今事實

彈於馬上

漢武帝元封中以江都王建女細君為公主妻烏孫王

昆莫為右夫人念其行道使知音者馬上奏琵琶以慰之又王昭君初適匈奴在路愁怨遂於馬上彈琵琶以寄其恨至今傳之謂之昭君怨

詳見嬪妃門

范曄為帝彈

宋范曄善琵琶文帝欲聞之屢諷以微旨曄偽為不曉終不肯為帝彈帝嘗飲宴歡適謂曄曰朕欲歌卿可彈曄乃奉旨

辨琵琶聲

唐漢中王瑀聞康崑崙奏琵琶曰琵琶聲多琵琶聲少未可彈五十四絲大絃也自下逆鼓曰琵琶自上順鼓曰琵琶

阮咸善琵琶

阮咸妙音律善琵琶雖處世不交人事惟共親知酣宴而已

賀懷智善琵琶

唐開元中賀懷智善琵琶以石為槽以鷓鴣筋作絃用鐵撥彈

謂之阮咸 係阮

唐元行冲有人破古塚得銅器似琵琶身正圓人莫能辨行冲曰此阮咸所作器也命易以木弦之其聲雅亮樂家遂謂之阮咸

古今文集

古詩

琵琶行 並序

白居易

元和十年予左遷九江郡司馬明年秋送客湓浦口聞

舟船中夜彈琵琶者聽其音錚錚然有京都聲問其人
本長安娼女嘗學琵琶於穆曹二善才年長色衰委身
為賈人婦遂命酒使快彈數曲曲罷憫然自叙少小時
歡樂事今漂淪憔悴轉徙於江湖間余出官二年恬然
自安感斯人言是夕始覺有遷謫意因為長句歌以贈
之凡六百一十二言命曰琵琶行

潯陽江頭夜送客楓葉荻花秋瑟瑟主人下馬客在船
舉酒欲飲無管絃醉不成歡慘將別別時茫茫江浸月

忽聞水上琵琶聲主人忘歸客不發尋聲暗問彈者誰
琵琶聲停欲語遲移船相近邀相見添酒回燈重開宴
千呼萬喚始出來猶抱琵琶半遮面轉軸撥絃三兩聲
未成曲調先有情絃絃掩抑聲聲思似訴平生不得志
輕攏慢撚抹復挑初為霓裳後六么大絃嘈嘈如急雨
小絃切切如私語嘈嘈切切錯雜彈大珠小珠落玉盤
間關鶯語花底滑幽咽泉流水下灘水泉冷澁絃凝絕
凝絕不通聲漸歇別有幽愁暗恨生此時無聲勝有聲

銀瓶乍破水漿迸鐵騎突出刀槍鳴曲終收撥當心畫
四絃一聲如裂帛東船西舫悄無言唯見江心秋月白
沈吟放撥插絃中整頓衣裳起斂容自言本是京城女
家在蝦蟆陵下住十三學得琵琶成名屬教坊第一部
曲罷曾教善才服粧成每被秋娘妬五陵年少爭纏頭
一曲紅綃不知數鈿頭雲篦擊節碎血色羅裙翻酒汗
今年歡笑復明年秋月春風等閒度弟走從軍阿姨死
暮去朝來顏色故門前冷落車馬稀老大嫁作商人婦

商人重利輕別離前月浮梁買茶去去來江口守空船
遶船月明江水寒夜深忽夢少年事夢啼粧淚紅闌干
我聞琵琶已歎息又聞此語重唧唧同是天涯淪落人
相逢何必曾相識我從去年辭帝京謫居卧病潯陽城
潯陽地僻無音樂終歲不聞絲竹聲住近湓池地低濕
黃蘆苦竹繞宅生其間旦暮聞何物杜鵑啼血猿哀鳴
春江花朝秋月夜往往取酒還自傾豈無山歌與村笛
嘔啞啁哳難為聽今夜聞君琵琶語如聽仙樂耳暫明

莫辭更坐彈一曲為君翻作琵琶行感我此言良久立
却坐促絃絃轉急淒淒不似向前聲滿座之間皆掩泣
就中泣下誰最多江州司馬青衫濕

古纏頭曲

蘇子瞻

鷗絃鐵撥世無有樂府舊工惟尚叟一生喙硬眼無人
坐此困窮令白首翠鬟女子年十七指法已似呼韓婦
驚帆渡海風掣迴滿面塵沙和淚垢青衫不逢湓浦客
紅袖謾插曹綱手爾來一見哀駘佗

惡人出
莊子

便著臂鞢

躬井白我慙貧病百不足強對黃花飲白酒轉關護索
動有神雷輓空堂戰窓牖四絃一抹擁袂立再拜十分
為我壽世人只解錦纏頭與汝作詩傳不朽

律詩

夜聽琵琶

羊士諤

破撥聲繁恨已長低鬟斂黛更摧藏潺湲隴水聽難盡
併覺風沙繞杏梁

詩話

用左右手

白樂天琵琶行云曲罷曾令善才伏而善才姓名不見於傳記後見琵琶錄云元和中曹保有子善才善才有子綱皆能琵琶又有裴興奴與曹同時樂府雜錄云綱善為運撥興奴長於攏撚時人謂綱有右手興奴有左手樂天又有聽曹綱琵琶示重蓮詩曰誰能截得曹綱

手插向重蓮紅袖中

高齋詩話

古詩

阮係

和令狐相公聽阮咸

劉禹錫

阮巷久蕪沉四絃有遺音雅聲發蘭室遠思含竹林
坐絕衆賓語庭移芳樹陰飛觴助真氣寂聽無流心影
似白團扇調諧朱絃琴一毫不平意幽怨古猶今

聽宋宗孺摘阮歌

黃魯直

翰林尚書宋公子文采風流今尚爾自疑耆域是前身
囊中探丸起人死貌如千歲枯松枝落魄酒中無定止
得錢百萬送酒家一笑不問今餘幾手揮阮咸送飛鴻

促絃聒醉驚客起寒蟲催織月籠秋獨鴈叫羣天拍水
楚國羈臣放十年漢家佳人嫁千里清閨洞房語恩怨
紫燕黃鸝韻桃李楚狂行歌驚市人漁父拏舟在葭葦
問君枯木著朱繩何能道人意中事君言此物傳數姓
玄壁庾庚有橫理開門三月傳國工身令親見阮仲容
我有江南一丘壑安得與君醉其中曲肱聽君寫松風

箏

羣書要語箏施絃高箏箏然

釋名

箏秦聲五絃筑身

風俗通

箏者上圓象天下平象地中空準六合絃柱十二擬十

二月乃仁智之器也今并涼二州箏形如瑟不知誰改

也

風俗通

追赴促彈急擊扣危洪纖雜沓或合或離

傅玄賦

詩句瓊柱動金絲秦聲發趙曲

梁元帝

按曲動花鈿

梁王臺卿

促調移輕柱亂手度繁絃

同上

秦箏玉指調銀甲彈箏

用

杜

佳人當窓弄白日絃將手語彈鳴箏

杜

古今事實

蒙恬所造

蒙恬所造故曰秦箏

風俗通

桓伊撫箏

晉桓伊字叔夏為豫州都督時謝安婿王國寶專利無厭安每抑制之孝武末年嗜酒而會稽王道子狎昵諂邪國寶以安功名盛極而間之帝召伊宴飲安侍坐帝命伊吹笛伊神色無忤即吹為一弄乃放笛云臣於箏分乃不及笛然自足韻合歌管并請一吹帝善其調達勅御妓奏笛伊曰御府人於臣必自不合臣有一奴善

相便串帝召之奴既吹笛伊撫箏而歌怨詩曰為君既
不易為臣良獨難忠信事不顯乃有見疑患周旦佐文
武金縢功不刊推心輔王政二叔反流言聲節慷慨俯
仰可觀安泣下霑襟越席就之將其鬚曰使君於此不
凡帝甚有愧色

帳中鼓箏

呂布詣袁紹紹患布欲殺之遣三十六兵被鎧迎布使
著帳邊卧布知之使於帳中鼓箏諸兵卧布出帳去兵

不覺也

古今文集

雜著

箏賦

侯瑾

於是急絃促柱變調改曲卑殺纖妙微聲繁縟散清商而流轉兮若將絕而復續紛曠蕩以繁奏邈遺世而越俗若乃察其風采練其聲音美哉蕩乎樂而不淫雖懷思而不怨似豳風之遺音於是雅曲既闋鄭衛仍修新

聲順變妙弄優游微風漂飈冷氣輕浮感悲音而增歎
愴嘖悴而懷愁若乃上感天下動鬼神享祀祖宗酌
酢嘉賓移風易俗混同人倫莫有尚於箏者矣

人亡器存

劉禹錫與柳子厚書曰嗟夫箏郭師與不可傳者死矣
弦張柱差枵然貌存中有至音含糊弗聞噫人亡而器
存布方策者是已

古詩

聞箏作

劉子翬

月高夜鳴箏聲從綺窓來隨風更迢遞
縈雲暫徘徊餘音若可玩繁絃互相催
不見理箏人遙知心所懷事悲舊寵失
豈念新期乖含情鬱不發寄詩宣餘哀
一彈飛霜零再撫流光頽每恨聽者稀
銀甲生浮埃幽幽孤鳳吟衆鳥聲難諧
盛年嗟不偶況乃容華衰道同符片語
志異勞百媒栖栖牆東客亦抱凌雲才

律詩

詠箏

王臺卿

依歌時轉韻按曲動花鈿促調移輕柱亂手度繁絃唯
有高秋月秦聲獨可憐

聽箏

張九齡

端居正無緒那復發秦箏纖指傳新意繁絃起怨情悠
揚思欲絕掩抑態還生豈是聲能感人心自不平

箏

白居易

雲髻飄蕭綠花顏旖旎紅雙眸剪秋水十指剥春葱楚

艷為門閥秦聲是女功
甲鳴銀玦柱觸玉玲瓏
猿苦啼嫌月鶯嬉語泥
風移愁來手底送恨入
絃中趙瑟情相似胡琴
調不同慢彈迴斲鴈急
奏轉飛蓬霜珮鏘還委
水泉咽復通珠聯手拍
碎刀截一聲終倚麗精
神定矜能意態融歇時
情不斷休去思無窮燈
下清歌夜尊前白首翁
且聽應得在老耳未多
聾

聽軋箏

劉禹錫

滿座無言聽軋箏
秋山碧樹一蟬清
只應曾送秦王女

寫得雲間鸞鳳聲

詩話

聽箏占事

高駢鎮蜀口以南詔侵暴築羅城四十里朝廷雖加恩
賞亦疑其跋扈或一日聞奏樂聲知有改移乃題風箏
寄意曰夜靜絃聲響碧空宮商信任往來風依稀似曲
纔堪聽又被風吹別調中旬日報到移鎮渚宮

篴篥

羣書要語箜篌一曰坎侯

風俗通

詩句女樂抱箜篌

坡

古今事實

師延所作

箜篌師延所作靡靡之樂後出桑間濮上之地師涓為
晉平公鼓焉鄭衛分其地而有之遂號鄭衛之音

釋名

作箜篌引

箜篌引者朝鮮津卒霍里子高所作也有一征夫被

髮提壺涉河而渡其妻追止之不及墮河而死乃號天
噓唏鼓箜篌而歌曰公無渡河公竟渡河公渡河而死
當奈何曲終投河死子高援琴作此歌故曰箜篌引

侯氏所作

漢武帝祠太一后土令樂人侯調依琴作坎侯言其坎
坎應節也侯以姓冠章也

古今文集

雜著

瑩篋賦

晉鈞滔母孫氏

考茲器之所起實侯氏之所營遠不假於琴瑟顧無取
乎竽笙爾乃陟九峻之增巖晞承溫之朝日剖嶧陽之
孤桐伐楚宮之椅漆徵班輸之造器命伶倫而調律浮
音穆以遐暢沉響幽而若絕樂操則寒條反榮哀曼則
晨華朝滅邈漸離之清角超子野之白雪然思超梁甫
韻登華岳路嶮悲秦道難怨蜀遺逸悼行邁之離秋
風哀年時之速陵危柱以頡頏憑哀絃以躑躅於是數

轉難測聲變無方或冉弱以飄沉或頓挫以抑揚或散
角以放羽或攄徵以騁商

古詩

箜篌

梁簡文帝

振遲初挑吹弄急時催舞釧響逐絃鳴衫迴半郭柱欲
知心不平君看黛眉聚


李供奉彈箜篌歌

顧況

國府樂手彈箜篌亦黃條索金鍍頭早晨有勅駕鸞

殿夜靜遂歌明月樓起坐可憐能抱搨大指調絃小指
撥腕頭花落舞恐裂手下鳥驚飛撥刺珊瑚席一聲一
聲鳴錫錫羅綺屏一絃一絃如撼鈴急彈好遲亦好宜
遠聽宜近聽左手低右手舉易調移音天賜與大絃似
秋鴈聯聯度隴關小絃似春燕喃喃向人語手頭疾腕
頭軟來來去去如風卷聲清泠泠鳴索索垂珠碎玉空
中落美女爭窺玳瑁簾聖人捲上真珠箔大絃長小絃
短小絃緊快大絃緩李供奉儀容質身才稍稍六尺一

在外不曾輒教人內裏聲聲不遣出馳鳳闕拜鸞殿天子一日一回見王侯將相立馬迎巧聲一日一回變實可重不惜千金買一弄



古今事文類聚續集卷二十二

欽定四庫全書

子部

古今事文類聚續集卷二十三
四

詳校官中書臣孫衡

侍讀臣孫球覆勘

總校官編修臣王燕緒

校對官中書臣潘奕雋

謄錄監生臣牟焜

欽定四庫全書

古今事文類聚續集卷二十三

宋 祝穆 撰

樂器部

笙 簧 竽並同

羣書要語笙生也象物貫地而生以匏為之故曰匏笙
是也其中空以受簧也釋名大笙謂之巢小者為之和竽
暖也立春之氣暖生萬物者也竽管三十六宮在右和

十三管宮居中

兩雅

舜祠之下得白玉管十三簧象鳳之

身

說丈

笙鏞以間

益稷

吹笙鼓簧

鹿鳴

疏音簡節

王冀

笙賦

詩句管清羅袖拂響合絳唇吹

梁陸罕

兩兩白玉童雙吹

紫鸞笙

李白

高門吹笙竽

韓

仙人十五愛吹笙學得崑丘

彩鳳鳴

李

綠髮青瞳仙骨輕飄然乘鶴去吹笙

歐誰道

使君貧且老繡屏錦帳咽笙簧

坡

古今事實

女媧造笙

女媧作笙簧

明堂位

女媧造列管於匏上內簧其中

唐樂志

雙成吹笙

西王母命侍女董雙成吹雲和之笙

漢武內傳

王喬吹笙

王子喬者周靈王太子晉也好吹笙作鳳鳴遊伊洛間

道士浮丘公接以上嵩山

列仙傳

一云乘鶴而去

見鶴

門

南郭吹竽

齊宣王使人吹竽有三百人南郭先生不知竽而濫於
三百人之中以食祿宣王死文王即位一一聽之先生
乃逃去或云韓昭侯田岩使一一聽之乃知其濫也

韓子

古今文集

雜著

笙賦

潘安仁

河汾之寶有曲沃之懸匏焉鄒魯之珍有汶陽之孤篠
焉徒觀其制器也則審洪纖面短長剝力結切生篠裁熟

簧

以熟銅為之

設宮分羽經徵列商泄之反謚厭焉乃揚將

援鳴笙而將吹先盟噦以理氣

吐吹之貌

初雍容以閒暇中

拂鬱以怫悵終嵬我以蹇愕又颯還而繁沸罔浪孟以

惆悵若欲絕而復肆擗檄糴以奔邀似將放而中匱或

既往不返或已出復入樂聲發而盡室歡悲音奏而列

坐泣獮

捻

纖翮以震幽簧越上筦而通下管

笙翮謂笙之管也言

其象鳳翮也簧在內故云幽簧謂簧聲逾越上筦之孔而通下管之背

應吹噏以往來隨

抑揚以虛滿勃慷慨以膠

留

亮顧躊躇以舒緩輟張女

之哀彈流廣陵之名散詠園桃之夭夭歌棗下之纂纂

張女廣陵園桃
棗下皆曲名

歌曰棗下纂纂朱實離離宛其死矣

化為枯枝人生不能行樂死亦何以虛謚為爾乃引飛

龍鳴鷗雞雙鴻翔白鶴飛子喬輕舉明君懷歸荆王喟

其長吟楚妃歎而增悲

子喬荆王昭君
楚妃歎皆古詞

惟笙也能研群

聲之清惟笙也能總衆清之林衛無所措其邪鄭無所
容其淫非天下之和樂不易之德音其孰能與於此乎

古詩

吹笙引

王穀

媧皇遺音寄玉笙雙成傳得何淒清丹穴嬌雛十七隻
一時飛上秋天鳴水泉迸瀉急相續一束宮商裂寒玉
旖旎香風繞指生千聲妙盡神仙曲曲終滿席悄無語
巫山冷碧愁雲雨

律詩

笙

沈約

彼美實孤枝孤篠定參差鷓鴣雞已啁哳棗下復林離本

期王子晉寧待洛濱吹

笙

楊希道

短長插鳳翼洪細摹鸞音能令楚妃歎復使荆王吟
切切孤竹管來應雲和琴

聽鄰家吹笙

戴叔倫

鳳吹聲如隔綵霞不知牆外是誰家重門深鎖無尋處
惟有碧桃千樹花

簫

羣書要語蕭肅也其聲肅肅而清也大者三十三管長

三尺四寸小者十六管

釋名

大蕭謂之蕭小者謂之笛

爾雅

蕭長尺四寸二十四竽頌蕭尺二寸十六竽同洞蕭管

之無底者

釋名

蕭長則濁短則清以蜜蠟實其底而增減

之則和管而音調當與琴瑟相參

李邕月令

絳唇錯雜注以

朱飾其吹

王褒賦

江寧縣南四十里慈母山積石臨江生

蕭管竹王褒洞蕭賦所稱即此其竹圓緻異於他處自

伶倫採於嶰谷其後惟此籥見珍故歷代常給樂府俗

呼曰鼓吹山

丹陽記

詩句危聲合鼓歌絕弄混笙篪

梁孝儀

簫管悲且清

潘岳

吹

簫彩鳳臺

李

古今事實

舜作簫

舜作簫其形參差以象鳳翼

風俗通

簫韶九成鳳凰來儀

書

簫史弄玉

簫史者秦穆公時人善吹簫能致鳳凰穆公以女弄玉妻焉一旦隨鳳飛去

吹簫吳市

伍子胥鼓腹吹簫乞食於吳市

吹簫給喪

周勃常為人吹簫給喪事

古今文集

雜著

洞簫賦

王褒

元帝為太子嘉其詞令後宮貴人皆誦讀之
原夫簫簫之所生出於江南之丘墟洞條暢以罕節標數紛以
扶疎觀其傍山側則嶮嶽嶠崎戲阨綺靡誠可悲乎其不
安也彌望儻莽連延曠蕩又足樂乎其敞閒也託身軀於厚
土經萬世而不遷翔鳳蕭蕭經其末回江流水溉其山朝露清
冷而隕其側玉液浸潤而成其根孤雌寡鵠娛優乎其下春禽
羣嬉翔翔乎其顛秋蛸不食抱樸而長吟玄猿悲嘯搜索

乎其間於是般匠施巧夔襄准法帶以象牙提其會合故
聽其巨音則周流汎濫并包吐含若慈父之畜子也其妙聲
則清靜厭慝順叙卑達若孝子之事父也科條譬類誠應
義理澎湃慷慨一何壯士優游溫潤又似君子或留而不行
或行而不留憚憊爛漫亡耦失儔故知音者樂而悲之不知
音者怪而偉之故其為悲聲則莫不愴然累歎擻涕投淚
其奏懽娛則莫不憚漫衍凱阿那服膝者已是以蟋蟀尺蠖
跂行喘息蟋蟻蝓蜒蠅翅翾翾遷延徙返魚瞰雞睨垂喙

蜚轉瞪瞠忘食况乎感陰陽之和而見風俗之倫哉

笛臧栗

羣書要語笛七孔簫也羌笛三孔說丈笛滌也所以滌邪

穢納之雅正也長尺四寸七孔風俗通竒曲雅樂所以禁

淫宋玉賦

詩句羌笛隴頭鳴選高樓夜吹笛杜三年笛裏關山月

杜落日樓臺一笛風杜牧長笛一聲人倚樓趙

古今事實

伶倫作笛

黃帝使伶倫伐竹於昆谿斬而作笛吹之作鳳鳴

史

丘仲作笛

武帝時丘仲作笛

風俗通

列和吹笛

列和善吹笛吳姬之聲無以加也

傅子

柯亭竹椽

蔡邕宿於柯亭之館以竹為椽仰而眄之曰良竹也取

以為笛奇聲獨絕歷代傳之

伏滔長笛賦序

作長笛頌

馬融追慕王子淵枚乘劉伯康傅武仲等簫琴笙頌
惟笛獨無故作長笛頌李善注王子淵作洞簫賦

桓伊吹笛

桓伊善音樂畜蔡邕蜀亭笛嘗自吹之王徽之泊舟
青溪側素不相識伊於岸上過客稱伊小字曰此桓野
王也徽之便令人謂曰試為我奏伊時貴顯素聞徽之

名便下車踞胡床而作三調弄畢便上車去客主不交

一言

又見
箏門

毆殺笛妓

帝舅王愷嘗置酒王遵王敦俱往女妓吹笛小失聲愷拂意便令黃門毆殺之一坐改容敦神色自若

晉書

以笛妓賜

宋禕是石崇妓綠珠弟子有國色善吹笛後在晉明帝宮帝患危篤羣臣進諫請出宋禕時朝賢悉見帝曰卿

諸人誰欲得者衆人無言阮遙集時為吏部尚書對曰
願以賜臣即與之

世說

知臥吹笛

唐汝陽王璵知音律嘗早朝聞笛曰是太常工也他日

識之曰何故卧吹笛工驚謝

隋唐嘉話

山石可裂

李舟得村舍煙竹截以為笛堅如鐵石以遺李牟牟吹
笛天下第一月夜泛舟吹之俄有客呼船請載既至請

吹之其聲清壯山石可裂及入破呼吸盤擗應聲粉碎
客忽不見疑蛟龍也

國史補

古今文集

雜著

笛賦

宋玉

余嘗觀於衡山之陽見竒篠異幹罕節簡枝之叢生
也其處傍塘千仞絕谿陵阜隆崛萬丈盤石雙起丹水
涌其左醴泉流其右師曠將為陽春北鄭白雪之曲取

其雄焉宋意將送荆卿於易水之上得其雌焉於是天
旋少陰白日西靡命嚴春使午子延長頸奮玉指摘朱
唇曜皓齒頰頰臻玉貌起吟清商起流徵其辭曰近世
雙笛從羌起羌人伐竹未及已龍鳴水中不見已

胡練反

截竹吹之聲相似剡其上孔通洞之裁以當

去邁竹瓜反

便易持

邁馬策也

易京君明

京房字君明修易

識音律故本四孔加

以一君明所加孔後出是謂商聲五音畢

古詩

鐵笛亭

朱元晦

故侍郎胡公明仲嘗與武夷山之隱者劉
君兼道遊劉少豪勇游俠使氣晚更晦迹
自放山水之間善吹鐵笛有穿雲裂石之
聲胡公詩有更煩橫鐵笛吹與衆仙聽之句
予與客數人尋其故迹適有笛聲發林外悲
壯回鬱巖石皆震追感賦詩

何人轆鐵笛噴薄兩崖開千載留餘響猶疑笙鶴來

鐵笛亭

楊廷秀

誰將點漆金鑄作孤竹笛林外吹一聲震落千峰石

江月圖

崔鷗

冥冥一葉輕不知水與天獨於顚氣中仰見素壁圓超
然狂道士起視清夜闌自拈白玉笛吹此江月寒想當
萬籟息逸響流空煙我從江海來形留意先還何當買
漁蓬追此水墨仙

金陵聽韓侍御吹笛

李白

韓公吹玉笛惆悵流玉音風吹遶鍾山萬壑皆龍吟王
子停鳳管師襄掩瑤琴餘響渡江去天涯安可尋

武昌老人說笛歌

劉禹錫

武昌老人八十餘手把庾令相問書自言年少學吹笛
早事曹王曾感激往年征鎮戍蘄州楚山蕭蕭笛竹秋
當時買材恣撻索典却身上烏貂裘古苔蒼蒼封老節
石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去興猶遲

音韻高低耳不知氣力已微心尚在時時一曲夢中吹
律詩

青溪半夜聞笛

李白

羌笛梅花引吳溪隴水清寒山秋浦月腸斷玉關情

聞笛

戎昱

入夜思歸切笛聲寒更哀愁人不願聽自到枕前來風
起塞雲斷夜深關月開平明獨惆悵飛盡一庭梅

聞笛

劉彥沖

倚樓何處笛飛響
徹雲霄曲怨吹難盡
風回聽忽遙戍
兵臨絕漠
閨婦起寒宵
一弄梅飛雪
華年鬢亦凋

聽吹鷓鴣

許渾

金谷歌傳第一流
鷓鴣清怨碧雲愁
夜來省得曾聞處
萬里月明湘水流

與史郎中飲聽黃鶴樓吹笛 李白

一為遷客去長沙
西望長安不見家
黃鶴樓中吹玉笛
江城五月落梅花

從軍北征

李益 英華

天山雪後海風寒橫笛偏吹行路難
磧裏征人三十萬一時回首月中看

昇平詞

王元之

細草烟深暮雨收牧童歸去倒騎牛
笛中一曲昇平樂笑得生來未解愁

大暑水閣聽晉卿家昭華吹笛

黃魯直

蘄竹能吟水底龍
玉人應在月明中
何時為洗秋空熱
散作霜天落葉風

吹笛

杜甫

吹笛秋山風月清
誰家巧作斷腸聲
風飄律呂相和切
月傍闌山幾處明
胡騎中宵堪北走
武陵一曲想南征
桓伊為南
征將軍
故園楊柳今搖落
何得愁中却盡生
桓伊撰
折楊柳
尤妙後人不
能盡其指訣

詩話

郭長生吹笛

永嘉中泰山民巢氏先為相縣令家婢採薪忽有一人
追隨婢還家不使人見與婢宴飲輒吹笛而歌歌云閒
夜寂寂清長笛亮且鳴若欲知我者姓郭字長生

古詩

以下係
感栗

小童薛陽陶吹感栗歌

白居易

剪削乾蘆插寒竹九孔漏聲五音足近來吹者誰得名
關雎老死李裒生裒今又老誰其嗣薛氏小童年十二

指點之下師授聲含嚼之間天與氣潤州城高霜月明
吟霜思月欲發聲山頭水底何悄悄猿鳥不喘魚龍聽
翕然聲作疑管裂訕然聲盡疑刀截有時婉軟無筋骨
有時頓挫生稜節急聲圓轉促不斷栗栗轉轉似珠貫
緩聲展引長有條有條直直如筆描下聲乍墜石沉重
高聲忽舉雲飄蕭明旦公堂陳宴席士人命樂娛賓
僚碎絲細竹徒紛紛官調一聲雄出羣衆音覩縷不落
道有如部伍隨將軍嗟爾陽陶方稚齒下手發聲已如

此若教白頭吹不休但恐聲名壓關李

羅隱薛陽陶感粟歌云

李德裕

上相東征日曾

為陽陶歌感粟吳江太守

白樂天

會稽侯

元稹

相次

三篇皆俊逸

夜聞感粟

杜甫

夜聞感粟滄江上衰年側耳情所向鄰舟一聽多感傷
塞曲三更歎悲壯積雪飛霜此夜寒孤燈急管復風湍
君知天地干戈滿不見江湖行路難

霜夜對月聽小童薛陽陶吹觱栗歌

李德裕

君不見秋山寂歷風飈歇
半夜青崖吐明月
寒光乍出松篠間
萬籟蕭條從此發
忽聞歌管吟朔風
精魂想在烟巖中

磬

水盞
拍板

方響

羣書要語磬者夷則之氣萬物之成也

白虎通

戛擊鳴球

註玉磬

益

泗濱浮磬註水中浮石可以為磬

禹貢

笙磬同

音鼓刻此樂石顏註即泗磬也

嶧山碑

古今事實

作磬之始

無句作磬

世本

擊石獸舞

變曰於予擊石拊石百獸率舞 又夏擊鳴球註玉磬也

垂磬待擊

見鼓門

有心擊磬

子擊磬於衛有荷蕢而過孔氏之門者曰有心哉擊磬

乎
語十
四

水濱得磬

武帝時犍為郡於水濱得古磬十六枚劉向因是說上

陳禮樂

水盞

以下係雜樂器

隋萬寶常被配為樂戶妙達鍾律與人方食論及聲調

時無樂器竇常因取前食器及雜物以箸叩之品其高下宮商畢備諧於絲竹即今所謂水盞子也

方響

胡部無方響緣直板聲不應諸調太宗內庫別收一片鐵有方響應二十八調足箏只有宮商角羽四調臨時移柱應二十八調

拍板

牛僧孺攜所業謁韓愈皇甫湜以拍板為樂句二公大

稱賞

衆樂並舉

明皇朝新豐進女伶謝阿蠻善舞態度絕妙上就按於
清元殿寧王吹笛上羯鼓楊妃琵琶馬仙期方響李龜
年感粟張野狐箏篳篥賀懷智拍板

楊妃
外傳

古今文集

古詩

方響歌

李允

英華

敲金扣石聲相陵遙空冷靜天正澄寶瓶下井轆轤急
小娃弄索傷清冰穿絲透管音未歇迴風繞指驚泉咽
李倫怒擊珊瑚摧靈芸薛靈芸魏文帝美人也整鬢步搖折十六
葉中侵素光寒玲震月雜佩璫雲和不覺罷餘怨蓮峰
一夜啼琴姜急節寫商商恨促秦愁越調逡巡足夢入
仙樓夏殘曲飛霜稜稜上秋玉

律詩

方響

杜牧

數條秋水挂琅玕玉手丁當怕夜寒曲盡連敲三五下
恐驚珠淚落金盤

笳角

羣書要語漢鹵簿云騎執笳

應劭注

車駕住吹小笳發吹

大笳笳即葭也

晉先賢儀注

羌人笳卷蘆葉而吹之故曰胡

笳

唐韻

胡笳有其曲不記所出本末笳者羌人卷蘆葉吹

以作樂也

漢舊錄

角角本出羌人以驚中國之馬也

徐廣車服

志

詩句胡笳樓上發哀怨不堪聽杜哀笳曉猶咽杜笳吟

細柳營杜鼓角動江城杜鼓角悲荒塞杜五更鼓角聲

悲壯杜

古今事實

蔡琰胡笳

蔡琰字文姬先適河東衛仲道夫亡無子歸寧於家漢末大亂為邊騎所獲在左賢王部伍中春月登蕃殿感笳之音作詩言志曰胡笳動兮邊馬鳴孤雁歸兮聲嚶

嚶

劉疇吹笳

劉疇曾避亂塢壁賈人百數欲害之疇無懼色援笳而吹之為出塞之聲動其遊客之思於是羣賈皆倚泣而

去

曹嘉之
晉書

越石吹笳

劉越石為蕃騎所圍數重城中窘迫無計劉始夕乘月登樓清嘯蕃衆聞之皆愴然長歎入夜次奏胡笳衆皆

流涕人有懷土之切向曉又吹敵并棄圍奔走

蚩尤吹角 以下係角

蚩尤氏帥魑魅與黃帝戰於涿鹿帝乃命吹角為龍鳴

以禦之

晉志

占角聲

元祐四年夏余至河東一日與郡僚旅見提刑孫亞夫
孫曰近日府中角聲不和咎在太守時蒲資政方到府
未逾月落職知虢州數日余獨見孫曰角聲愈不和矣

未幾王震待制自同來鎮蒲七日丁母夫人憂去至九
月中孫復語近官曰角聲不和尤甚前日尋報蒲中行
龍圖自襄移蒲十月到官明年春病卒其驗如此

澠水燕談

古今文集

雜著

胡笳十八拍

姑載二拍

蔡琰

東風應律兮暖氣多知是漢家天子兮布陽和羌人蹈
舞兮共謳歌兩國交讎兮罷兵戈忽遇漢使兮稱近詔

遺千金兮贖妾身喜得生還兮逢聖君嗟別稚子兮會
無因十有二拍兮哀樂均去住兩情兮誰具陳不謂殘
生兮却得旋歸撫抱蕃兒兮泣下沾衣漢使迎我兮四
牡駢駢號失聲兮誰得知與我生死兮逢此時愁為子
兮日無光輝焉得羽翼兮將汝歸一步一遠兮足難移
魂銷影絕兮思愛遺十有三拍兮絃急調愁肝腸攪刺
兮人莫我知

古詩

聽董大彈胡笳聲兼語弄寄房給事云

李頎

蔡女昔造胡笳聲一彈一十有八拍邊人落淚向邊草
漢使斷腸對歸客古戍蒼蒼烽火寒大荒陰沉飛雪白
先拂商絃後角羽四郊秋葉驚撼撼董夫子通神明深
山竊聽來妖精言遲更速皆應手將徃復旋如有情空
山百鳥散還合萬里浮雲陰且明嘶酸雛鴈失羣夜斷
絕蕃兒戀母聲川為靜其波鳥亦罷其鳴烏珠部落家

鄉遠邇迹沙塵哀怨生幽音變調忽飄灑長風吹林雨
墮瓦迸泉颯颯飛木末野鹿呦呦走堂下長安城連東
掖垣鳳凰池對青瑣門高才脫略名與利日夕望君抱
琴至

雜著

以下
係角

道州鼓角樓記

韋禹錫

天聖
間

鼓角之制有自來矣肇帝鴻之御宇戰蚩尤於涿野克
壯乎虎旅取象乎龍吟爾後始皇備於鹵簿稷嗣定於

雅樂前征烏蠻之國遂寢乎兜勒之曲後分熊軾之寄
乃限乎天驕之奏故有屹襄湖之峻雉敞雲構之飛譙
三吹之調深切七萃之師咸肅丕顯乎威武底寧乎邊
鄙則知聖人備物致用其利溥哉

律詩

晚泊潤州聞角

李涉

孤城吹角水茫茫風引胡笳怨思長驚起暮天沙上鴈
海門斜去兩三行

聞角

杜牧

曉樓烟檻出雲霄
景下錢塘已寂寥
城角為秋悲更遠
護霜雲破海天遙

聽曉角

李益

繁霜一夜落平蕪
吹角當城片月孤
無數塞鴻飛不度
秋風卷入小單于

延平水南天慶觀夜作

朱元晦

石樓雲卧對江城
城角吟霜永夜清
料得南枝正愁絕

不堪聞此斷腸聲

鼓

羣書要語大者謂之鼓小者謂之應鼓謂之麻小者謂之料

擊鼓謂之号

爾雅

鼓人掌教六鼓以雷鼓鼓神祀以靈鼓鼓社祭

以路鼓鼓鬼享以鼗鼓鼓軍事以鼙鼓鼓役事以晉鼓鼓

金奏

禮

伐鼓淵淵

采

鼙鼓逢逢

靈

擊鼓其鏜

擊

君子聽鼓

鼙之聲則思將帥之臣

樂記

一鼓作氣

左

揚桴兮拊鼓

九歌

詩句村鼓時時急

杜

剽奪驚桴鼓

腰鼓百面如春雷

東海取鼙漫戰鼓 長夜默坐數更鼓

並坡

古今事實

立鼓求諫

堯立敢諫之鼓

設鼓待擊

禹以五音聽政縣鍾鼓磬鐸置鞀以待四方之士為號
曰教寡人以道者擊鼓喻寡人以義者擊鍾告寡人以
事者振鐸告寡人以憂者擊磬有獄訟告寡人者搖鞀

鼓以警衆

文王世子天子觀學大昕鼓以警衆

鳴鼓而攻

季氏富於周公而求也為之聚斂子曰小子鳴鼓而攻之可也

越雷門鼓

越之城門號雷門有大鼓越擊此鼓聲聞洛陽王尊傳曰毋持布鼓過雷門謂以布為鼓也

禰衡擊鼓

禰衡字正平孔融雅愛其才數稱賞於曹操操欲見之衡不肯往操以其才不欲殺之聞衡善鼓召為鼓吏會閱視音節諸吏過者皆令脫其故衣更著皂單絞之服至衡方操過踴躍而前吏呵之曰鼓吏何不改服而輕進衡於是先解褒衣次釋餘服裸身而立徐取皂單單絞而著之復操過顏色不怍操笑曰本欲辱衡衡反辱孤衡對曰不敢以先王之法服為伶倫之衣

桐材叩石鼓

晉武帝時吳郡臨平岸崩出一石鼓打之無聲問張華
華曰可取蜀中桐材作魚形扣之則鳴矣於是如其言

聲聞數里

異說

打細腰鼓

宋蕭思話年十許歲好騎屋棟打細腰鼓

題鼓寓譏

孫梔為延陵縣令國子助教高爽詣之梔了無故人懷

爽出閣下過取筆書鼓面云徒有此大腹了自無肝腸
面皮如許厚被打未遽夾

晨昏鳴鼓

馬周傳先是京師晨昏傳呼以警衆後置鼓代之俗呼
鼕鼕鼓

鼓樓警盜

李崇為兗州刺史兗土多劫盜崇為村置一樓樓掛一
鼓盜發之處雙槌亂擊諸村聞之皆守要路俄頃之間

聲聞百里悉能擒送鼓樓自崇始也

再納鼓環

燕龍圖肅有巧思初為永興推官知府寇萊公好舞柘枝有一鼓甚惜之其環忽脫公悵然以問諸匠皆莫知所為燕請以環腳為鑲簧內之則不脫矣萊公大喜燕為人寬厚長者博學多聞其刻漏法最精今州郡往

徃有之

歸田錄

古今文集

雜著

泗州重修鼓角樓記

李磻

烈而悲者角之聲謹而壯者鼓之聲烈與悲似義謹與壯似勇夫軍以義集以勇進故軍城例建樓鼓角於正門以嚴暮警夜二物用固均凡發語雖先鼓而後奏角先鳴者蓋欲勇生於義也

記里鼓賦

柳宗元

異哉鼓之設也恢制度於天邑佐大禮于時行即行贊

盛容而立之斯立觀其象可以守威儀之三千節其音
可以表吉行之五十配和鸞以入用並司南而為急

鼓銘

朱元晦

擊之鏜今朝旣陽兮巧趨蹌兮

律詩

題榆次縣樓鼓

文寬夫

置向譙樓一任撾撾多撾少不知他如今幸有黃紬被
努出頭來放早衙

鍾 寺鍾

羣書要語鍾空也內受氣多故聲大

釋名

大鍾謂之鏞其

中者謂之劇小者謂之棧

爾雅

以懸鍾者橫曰筍筍峻也

在上高峻也縱曰虞虞舉也在傍舉筍也

釋名

凡鍾十六

枚同為一簋簋者為編鍾特懸者謂之鐃

古今樂錄

凡金為

樂器有六皆鍾之類也曰鍾曰鐃曰鐃曰鐃曰鐃

鐃如鍾而大鐃鐃于也圓如椎頭上天下小所謂金鐃

和鼓也鐃鉦也形如小鍾軍行為鼓節鐃如鈴而無舌

有柄而執之鐸如大鈴

三禮圖

鳧氏作鍾兩欒謂之鈇

鈇鍾

口兩角也

鈇間謂之于于上謂之鼓鼓上謂之鉦鉦上謂之

舞鍾懸謂之旋旋蟲謂之幹鍾帶謂之篆篆間謂之枚

枚間謂之景于上之靡謂之隧凡鍾磬各有筓簨寫鳥

獸之形大聲有力者以為鍾簨清聲無力者以為磬簨

周禮發鯨魚鏗華鍾薛綜注曰海中有魚名鯨海島又有

大獸名蒲牢蒲牢畏鯨魚鯨魚擊蒲牢輒大鳴吼凡鍾

欲令聲大故作蒲牢於上以所擊之者為鯨魚有篆刻

大故曰華鍾

張衡西京賦

鍾鳴鼎食之家

王勃

詩句夜鍾清萬事

杜

金吼霜鍾徹

杜

長樂聞疎鍾

李

青

樓夾兩岸萬室喧歌鍾

李

有如寸挺撞巨鍾

孟東野

科斗

長收古鼎鍾

坡

金闕曉鍾開萬戶

岑

古今事實

作鍾之始

倕作鍾

世本

鍾鈕之名

禹時鍾在者追蠡也追鍾紐也蠡欲絕之貌

孟盡心注

釁鍾名落

叔孫為孟鍾享大夫以落之注以豕猪血釁鍾曰落

鍾鼓燕臣

鄭簡公謂子產曰飲酒之不樂鍾鼓之不鳴寡人之任也國家之不義朝廷之不治與諸侯交之不得志子之任也子無入寡人之樂寡人無入子之朝自是以來子產治鄭城門不開國無盜賊道無餓人孔子曰若鄭簡

公之好樂雖抱鍾而朝可也

尸子

勲銘景鍾

晉克潞之役秦有圖敗晉功魏顓以身却退秦于輔氏
親止杜回其勲銘之景鍾

每食擊鍾

宋左師每食擊鍾

鑄鍾審音

魏杜夔令紫玉鑄鍾清濁多不如法數毀改作玉甚厭

之玉謂變清濁任意更相見於太祖太祖更試然後知
杜變為精

鍾有銅滓

南史張永曉音律太極殿前鍾聲嘶孝武問永永答鍾
有銅滓乃求其處鑿去之聲遂清越

掘地得鍾

唐太常缺黃鍾鑄不能成李嗣真疑土中有之道上逢
車鐸聲甚厲嗣真曰此宮聲也市以歸振於空地若有

應者掘之得鍾衆樂遂和

古今文集

雜著

洪州太雲寺鍾銘

獨孤及

參變化孕律呂和神人莫疾於聲故天地以雷震萬物
聖人以樂節八風佛土以鍾警六時天造聖作同符異
貫自真乘開設其輪三轉像教不墜初漢鼓之制存彤
彤蓮宮于江之濱方井在其前善惡興乎人將欲誕敷

我法音啟迪我善根是以作萬鈞之鍾大其器所以昭
其度也虞誰尸之長者杜海泊此方上士精法觀釋法
鸞與比丘衆百三十有五人實果其願將辦所作於時
火官金工循厥戒令範陰陽九六之數以合造化均薄
厚侈儉之齊以諧清濁聚精會神鳩工於間弘誓旣遠
昏疑皆破故衆心如城施者成市大悲之感與萬靈接
祝融回祿髣髴交應越五月辛丑新鍾成於是此邦民
大和會膜拜縱觀川塞衢隘億兆諦聽鯨魚乃發訇然

如此扶搖號而萬竅怒霹靂作而崇山破在坑滿坑在
谷滿谷金界岌岌若震若盪旣而拘怒散渙與迴颺俱
激慶越大千周流六虛經于嚴城入于梵宮徘徊乎中
天凌厲乎清夜千門徹萬戶警魚龍皆奮蟲豸不蟄於
是聆其音者貪駭遷善聾盲知方識浪安流地獄清涼
吒王解形刀輪摧藏嚴乎心者聞聲以知受觀受以悟
法若露清耳根鏡照身業彼金鼓聲氣木鐸徇路整衆
孚號方斯陋矣蓋聖人弘道以觀善因善以建法作法

器以為天下利利者教之果法者教之因善者教之宗
我鍾乃懸是訓是崇世界有極太音無窮

化成寺大鍾銘

李白

噫天以震雷鼓群動佛以鳴鍾警大夢而能發揮沉潛
開覺茫蠢則鍾之取象其義博哉夫揚音大千所以清
真心警俗慮協響廣樂所以達元氣彰大聲銘勲皇宮
所以旌豐功昭茂德莫不配美金鼎鍾輝寶坊仍事作
制豈徒然也粵有唐宣城郡當塗縣化成寺大鍾者邑

宰李公之所勑也發一言以先覺舉百里而咸應秋毫
不挫人多子來銅崇朝而山積工不日而雲會乃採鳧
氏撰鴻鍾火天地之爐扇陰陽之炭回祿奮怒蜚廉震
驚金精轉潛以融熠銅液星熒而燿燿光噴日道氣蔽
天維紅雲點於太清紫烟矗於遙海烜赫宇宙功侔鬼
神瑩而察之吁可駭也爾其龍質炳發虎形躩踞縻金
索以上絙懸寶樓而迭擊傍振萬壑高聞九天聲動山
以隱隱響奔電而闐闐赦湯鑊於幽途息劍輪於苦海

景福盼響被于人天非李公好謀而成弘濟群物又孰
能與於此乎丞尉等與六曹豪吏姑熟賢老乃緇乃黃
鳬趨梵庭請揚宰君之鴻美白昔忝侍從備于詞臣恭
承德音敢闕清風之誦其詞曰

雄雄洪鍾砰隱天雷鼓霆擊警大千含號烜赫聲無邊
摧招魑魅招靈仙傍極六道下九泉劍輪輟苦期息肩
湯鎮猛火停熾然愷悌賢宰人父母興功利物信可久
傳芳金鍾永不朽

霜鍾賦

喬潭

南陽豐山有九鍾焉霜降則鳴潭叨遇達奚公擢甲科
然則南陽即公隱居之舊地為此賦以廣知音焉

豐山之峰巉函積翠之石森爽冒寒之松上無飛鳥下
無人蹤何杳杳以靜謐有天然之古鍾兩樂神資九乳
靈化寧失制於侈拚豈遺音於窈窕每虛氣以自得常
宿懸以警下動於耳而藏於心必高秋之涼夜於是泐
寥兮日暮而天晶蕭瑟兮霜落而風清爽氣無朕潛來

滿盈跳然復出鏗爾有聲信不擊而不考能大鳴而小
鳴始則合明擁鬱旋復充詘若往若還徘徊其間爾其
舒肆奔放長轡遠暢乍浮空以紆餘更觸物而瀏亮入
林蕭蕭在水湯湯泛濫小瀨聯緜踈篁夜鶴怨兮彌苦
寒猿悲兮更長餘韻春容隨風悠揚繞於洞庭浮於瀟
湘梧楸紛以離披蒹葭颺其蒼蒼及夫夜已艾兮彌靜
山無人兮月冷初肅肅以自淒復琅琅而虛警其動愈
出其來甚徐合於元化遊於太虛轉遠而盡誰知所如

大塊兮聲無作雖有聞兮常寂寞

古今事文類聚續集卷二十三